

Os Grupos Municipais da Marea Atlántica, Bloque Nacionalista Galego e Partido Socialista de Galicia-PSOE presentan a seguinte **EMENDA** de adición ao asunto único do pleno extraordinario de data 12 de novembro de 2019, consistente en *“Instar á Xunta a atender as demandas da Corporación da Coruña e a incorporalas nos seus orzamentos para 2020 no trámite parlamentario”*

O texto da emenda é o que sigue:

### **A Coruña nos orzamentos da Xunta para 2020**

O proxecto de lei de Orzamentos da Comunidade Autónoma para o exercicio 2020, aprobado polo Consello da Xunta o pasado 17 de outubro, pon de manifesto un ano máis o desprezo da Administración autonómica polas necesidades e potencialidades da Coruña, motor económico e social do país e cabeceira dunha importante área urbana de preto de 400.000 veciños e veciñas.

Os investimentos da Xunta de Galicia non conseguen nin sequera cumprir os seus compromisos adquiridos e recollidos en convenios xa asinados co Concello da Coruña.

O Pleno da Corporación Municipal da Coruña vese por tanto na obriga de elevar novamente as demandas polas que a cidade leva xa anos a agardar, entre as que destacan o impulso ás grandes infraestructuras de comunicación, a mellora dos servizos públicos básicos, as políticas de vivenda, a loita contra o cambio climático, o cumprimento de compromisos adquiridos e o apoio ao relanzamento económico nun momento de declive industrial.

### **Investimento insuficiente no sistema educativo**

En novembro do 2006 a Consellería de Educación e Ordenación Universitaria e o Concello da Coruña asinaron un convenio para a construción de patios cubertos en centros de educación infantil e primaria.

Unhas obras necesarias, conducentes a mellorar a calidade dos equipamentos educativos facilitando un espazo adecuado para o recreo nos días, moi frecuentes, de choiva. Mentres o Concello da Coruña cumpriu todos os seus compromisos, o último deles as obras no CEIP San Francisco Javier por case 400.000 euros, a Consellería acumula atrasos nos CEIP Labaca, Ramón de la Sagra, Curros Enríquez, Manuel Murguía e Zalaeta.

É imprescindible que a Xunta de Galicia destine máis recursos para que se materialicen as actuacións pendentes, e tamén que inclúa partidas para levar adiante os cambios das cubertas dos CEIP San Pedro de Visma e Curros Enríquez, para o que se precisarían 3,2 millóns. A cobertura do patio e a ampliación do comedor do CEIP María Pita son outras actuacións necesarias, ademais de

asegurar a accesibilidade nos centros educativos.

Propoñemos tamén que os orzamentos inclúan a construción de, cando menos, unha nova escola infantil que complemente a oferta existente que realiza o Concello da Coruña e que atenda a demanda de prazas públicas que non poden chegar a ser satisfeitas.

A última anualidade para o CEIP de Novo Mesoiro é unha boa noticia malia á demora na súa construción, mais non colma as expectativas do barrio. É necesario incorporar no centro un comedor escolar público, con persoal contratado pola consellería. É o modelo que demandamos na Coruña, que teña ademais en conta o seu potencial como fonte de riqueza dinamizando o comercio local e os produtos de proximidade, alimentos frescos e saudables, que aposten pola economía local e metropolitana, tanto por cuestións de saúde como de educación alimentaria.

### **Un centro de saúde para Santa Lucía e melloras da atención nos barrios**

Malia ao acordo unánime da Corporación Municipal da Coruña do pasado 3 de outubro para esixirlle á Xunta de Galicia que desbloquee, por fin, logo de varios anos de reiteradas negativas a varias alternativas, a construción do tan demandado centro de saúde de Santa Lucía, o proxecto de orzamentos non inclúe ningunha partida específica. É preciso, por tanto, incluír unha partida específica para habilitar este equipamento no actual edificio.

Polo demais, A Coruña segue a demandar a recuperación do servizo de xinecoloxía no Centro de Orientación Familiar (COF) do Ventorrillo, así como dotar dun servizo de pediatría e dunha matrona o centro de saúde de Novo Mesoiro, melloras na accesibilidade doutros centros, como o de Durmideiras, e unha maior dotación de efectivos para diversos centros nos que a demanda aumentou, como é o caso dos que atenden á veciñanza dos Rosais ou do Castrillón.

O compromiso de que ao longo de 2019 comezarían os estudos previos para a futura ampliación do CHUAC non pode supor unha merma do investimento noutros ámbitos da saúde, e por iso requerimos un incremento da partida de atención primaria na cidade até o 25% do total do gasto sanitario.

### **Benestar e atención social: o maior investimento é privado**

O maior investimento anunciado pola Xunta de Galicia para 2020 provén da Fundación Amancio Ortega, e destínase á construción dunha residencia de anciáns nunha parcela cedida polo Concello no barrio de Eirís.

O compromiso da Fundación Amancio Ortega coa cidade é ben recibido, pero tamén pon en evidencia a ausencia de compromiso do goberno galego coa cidade da Coruña, xa que sen a achega da Fundación o investimento da Xunta sería inexistente, esquecendo que a evolución demográfica de Galicia e o incremento da desigualdade obrigan a incrementar os esforzos na busca do benestar das persoas.

Os concellos, como administracións de proximidade, encárganse no día a día da xestión de competencias moi sensibles e esenciais para as persoas. Para garantir

unha maior e mellor cobertura, é necesario que a Xunta de Galicia incremente cando menos nun millón de euros os fondos que achega no Plan Concertado de Servizos Sociais, tanto para a prestación dos servizos como para a contratación de persoal, en especial na atención á dependencia e á promoción da autonomía persoal.

Ademais, cómpre que a Xunta suprima o co-pagamento no Servizo de Axuda no Fogar, que ademais de ser inxusto invade competencias municipais, e que se involucre xunto co Concello da Coruña no lanzamento dun programa de vivendas con apoio socioeducativo para maiores.

### **Cambio climático, tratamento de residuos e ciclo da auga**

Botamos en falta un maior esforzo da Xunta nas políticas de mitigación e adaptación ao cambio climático, nos seus catro eixos básicos: enerxía, natureza, mobilidade e residuos. A Xunta dedica, a través do INEGA, aproximadamente 11,5 millóns de euros en axudas a empresas privadas para o fomento da eficiencia e as enerxías renovables que contrastan cos 750.000 euros destinados aos concellos. E se en xeral falta audacia e compromiso coa transición enerxética, as actuacións propostas para A Coruña son simplemente inexistentes.

No seu proxecto orzamentario para 2020, a Xunta afirma “destinar unha cifra histórica para mellorar a xestión dos residuos urbanos e construír tres novas plantas públicas para os biorresiduos domésticos”. Aborda, polo tanto, a necesidade de tratar diferenciadamente a materia orgánica tal e como A Coruña leva facendo xa dúas décadas, pero marxina unha vez máis o modelo Nostián ao prever un nulo investimento para este sistema. Nun momento no que se renova a concesión e se acometen importantes obras de mellora na planta, a Xunta debería demostrar que é o goberno de todos os galegos e galegas. As dúas administracións, Concello e Xunta, están emprazadas a colaborar para mellorar a xestión dos residuos e a economía circular, no canto de utilizar o lixo como arma política, tal e como fomos presenciando ano tras ano. Cómpre introducir nos orzamentos de 2020 e 2021 unha partida acorde, como mínimo, cos investimentos feitos nas outras provincias.

### **Cumprir co compromiso coa cultura**

O proxecto de orzamentos da Xunta incrementa a achega autonómica anual ao Consorcio para a Promoción da Música até 2,7 millóns, pero ignora unha demanda reiterada do Concello da Coruña e o acordo unánime da Corporación o pasado mes de outubro.

A cantidade continúa a resultar insuficiente para cumprir o convenio de 2005 que establecía un equilibrio entre ambas institucións (en 2019 o Concello aporta 3,6 millóns). A actividade do Consorcio, especialmente dunha formación de excelencia como a Orquestra Sinfónica de Galicia, precisa de todo o respaldo posible. As achegas das institucións participantes determinan os límites e alcance da súa actividade.

## **Impulso, sen escusas, á intermodal e á mobilidade metropolitana**

O proxecto orzamentario da Xunta para 2020 evidencia o freo do goberno autonómico na materialización da estación intermodal de San Cristóbal, para a que prevé un escasísimo investimento de apenas 365.000 euros dos máis de 26 millóns que son precisos. Nada comparable ao esforzo que dedica a outras infraestruturas análogas no resto das cidades.

É urxente que esta previsión orzamentaria se incremente e se dote de xeito plurianual, para que o ano vindeiro poidan comezar as obras e se completen dentro do período de execución dos fondos europeos, que remata en 2023.

A ordenación do transporte e as vías de comunicación na área metropolitana da Coruña é unha ferramenta potente para artellar a cohesión dos concellos e os centros de interese económico, por iso demandamos a supresión da peaxe da AG-55 aproveitando a marxe de decisión que a Xunta posúe sobre vías da súa titularidade.

## **Aposta polo dereito á vivenda**

O proxecto de orzamentos para 2020 volve consignar 3 millóns de euros para a promoción de vivenda no Ofimático. Nada novo, nunha materia de especial importancia, á vista do preocupante incremento dos prezos do aluguer na cidade. É preciso un maior compromiso da Administración autonómica na promoción da rehabilitación, a vivenda pública e, máis en xeral, na garantía do dereito á vivenda.

Cómpre lembrar que o Concello da Coruña aprobou no pasado mandato incrementar ao máximo legal permitido o recargo no IBI para as vivendas baleiras, e que esta medida non pode aplicarse porque nin a Xunta nin o Estado, as únicas administracións que poden facelo, fixeron a súa parte: regular que pode considerarse, a estes efectos, unha vivenda baleira. Estímase que na Coruña hai 18.000.

## **Constitución dun ente público para o impulso da fachada marítima**

A transformación do borde litoral da Coruña para rescatar os terreos portuarios da especulación e impulsar un proxecto ilusionante, sostible, centrado no espazo libre, os equipamentos públicos e os usos produtivos xeradores de riqueza e emprego, esixe a constitución dun ente público participado polas administracións comprometidas coa cidade. Así o entenden a maioría das forzas políticas, como demostran os acordos maioritarios ou unánimes acadados tanto no Concello como na Deputación provincial, no Parlamento galego e no Congreso dos Deputados.

A Xunta de Galicia, como o Ministerio de Fomento e a Autoridade Portuaria, é unha das administracións chamadas a participar na constitución deste ente público. É por isto que, por coherencia co compromiso explicitado polo Presidente da Xunta hai dous anos, deberían consignar nos orzamentos de 2020 o investimento de máis de 20 millóns de euros que naquel momento, diante dos presidentes de Puertos del Estado e a Autoridade Portuaria da Coruña, se comprometeu a achegar.

## **Compromiso firme coa Cidade das TIC**

A Cidade das TIC é un proxecto estratéxico apoiado polas diferentes administracións que debe pasar das palabras aos feitos. A aportación da Xunta de Galicia para o impulso desta iniciativa clave para establecer un polo tecnolóxico de relevancia nacional non pode xustificarse dende unha partida xenérica que non inclúe o destino dos fondos, e que polo tanto carece de firmeza a nivel de compromiso.

A cidade das TIC precisa da acción decidida da Xunta e dos Estado, de partidas orzamentarias plurianuais e da cooperación institucional imprescindible que outorga viabilidade a proxectos estratéxicos desta envergadura.

En A Coruña, a 12 de novembro de 2019.

Asdo: María García Gómez

Voceira do GM Marea Atlántica

Asdo: Fco Xesús Jorquera Caselas

Voceiro do GM Bloque Nacionalista Galego

Asdo: Jose Manuel Lage Tuñas

Voceiro do GM PSdG-PSOE